



René Fritschi vuol mantgnair la spüerta dals seminaris cun lavuors artischanas e tradiziunalas.

MAD

Nouvas da la Pro Manufacta Engiadina

■ (anr/afi) Daspö duos ons spordscha la Pro Manufacta Engiadina a Scuol cuors e seminaris illas tecnicas tradiziunalas dals mansterans. D'incuort ha surtut René Fritschi da l'Argovia la gestiun da Rosaria Arquint Gallo. Seis intent es da cuntinuar cun la spüerta existenta e da tilla adattar davoman. El vuol trar a nüz ils novs trends chi vegnan vivüts illas citads grondas. Pro las

partecipantas e'ls partecipants da seis cuors vuol el svagliar las emozions cun agüd da las observaziuns fattas cun verer, cun palpar, cun tadlar e cun savurar. Il cuntgnü da l'instrucziun dess esser in avegnir plü focussà, uschè chi resta amo avuonda occasiun per gioldair il temp liber e las spüertas da la regiun.

> PAGINA 11

Formar in'equipa pigl avegnir

Schluein Glion ei semtgau pil campinadi da ballapei regional ella 3. ligia

DA HANS HUONDER / ANR

■ En biebein in'jamna entscheiva il campinadi da ballapei regional. Per Schluein Glion eis ei l'emprema stagiun ella 3. ligia sunter la relegaziun. Igl assistent dil trenader David Caduff quenta da fruntar leu sin equipas fermas ed ulivas.

En vesta alla stagiun da ballapei nova ha Schluein Glion integrau plirs juniors ell'emprema squadra. Quella profitescha aschia dalla buna lavur prestada ils davos onns sil sectur dils juniors. Damai che sulettamein dus giugadurs da tschep digl onn vargau ein buca pli dalla partida, ei il coc dall'equipa restaus il medem. Quei ei ina buna premissa per puder semesirar cun las autras fermas equipas dalla 3. ligia. Da finamiras concretas vul Caduff denton buca plidar: «Nus fagein negin squetsch sin l'equipa. La finamira ei d'integrar bein ils giugadurs novs e lu da prender in giug sunter l'auter. La fin dalla stagiun vegnin nus a verer nua che nus essan.» Tonaton lai el era sentir che Schluein Glion ha l'ambiziun da setener ell'emprema mesadad dalla tabella dalla



Luca Vinzens (dretg) ei in da plirs giugadurs da tschep che resta fideivels all'emprema equipa da Schluein Glion.

FOTO H. HUONDER

gruppa 1 dalla 3. ligia. Ch'igl ei reussiu da tener tut ils fermes giugadurs dils davos onns ellas atgnas retschas muossa che la loialitad enviers l'unien ei fetg gronda. Il cader dumbra 25 giugadurs, cun

excepciun da tschun ein tuts durront l'jamna ella regiun e san aschia absolver ils treis trenaments jamnills. Sunter ina fasa cun biars blessai igl atun vargau, ha Schluein Glion buca pli anflau il fil ella

2. ligia regionala. Schegie ch'ella ha mussau la primavera per part bunas prestaziuns, ei la relegaziun buca stada d'impedir.

> PAGINA 3

Lavuors artischanas e tradiziunalas a Scuol

La Pro Manufacta Engiadina es in nouvs mans

■ (anr/afi) La Pro Manufacta Engiadina a Scuol ha mudà possessur. L'intent da René Fritschi es da mantgnair in avant la spüerta da seminaris cun lavuors artischanas. L'intent da la Pro Manufacta Engiadina a Scuol nun es be da mantgnair las veglias tecnicas dals mansterans, dimpersè eir da laschar d'vantar l'artischanadi ün'aventüra. Las partecipantas e'ls partecipants dal cuors survegnan ün'invista illa cuschina regiunala, illas erbas ed illas masdinas indigenas. Avant bundant duos ons ha sport *Rosaria Arquint Gallo* ils prüms seminaris illas tecnicas tradiziunalas sco il sgrafitto, quella dals tagliapedras e quella dal liar cudeschs. Quai sun tuot mansters chi vegnan pratichats in l'ün o l'oter möd in Engiadina Bassa. D'incuort ha surtut *René Fritschi* l'affar da la Pro Manufacta Engiadina. Seis

intent es da cuntinuar cun la spüerta existenta e da tilla adattar davoman. «Ün'idea es da spordscher cuors da scriver texts culla scrittüra da la calligrafia o da far clinöz cun materials indigens», manzuna Fritschi. Tenor el nu's poja dir chi detta ün tipic artischanadi da l'Engiadina Bassa: «Eir in otras regiuns as intaglia lain o as fuschina.» Sias spüertas as drizzan a giasts chi cultivan ün stil da vita perdüraivel chi's fa valair illas citads grondas: «Quellas personas as sfadian da retrar mangiativas in qualità da bio, i prouvan da cumpensar lur viadis fats culs eroplans, ellas separan las immundizchas e vivan da maniera cha la prosma generaziun nun haja da surtour dischavantags chaschunats da la societä. E precis quists nouvs trends voul Fritschi trar a nüz per seis seminaris.

Svagliar ils sens

René Fritschi deriva da l'Argovia ed es ün paschiunà mansteran. Seis repertori da prodots tendescha da purtrets, mobiglia, glüms, coppas e bler oter plü. Cun s-chaffir sias creaziuns esa per el important da mantgnair l'artischanadi tradiziunal e la perdüraivlezza. Seis motto es da douvrrar tuot ils sens per svagliar pro'ls conumans emeziuns. Daspö ün mez on es el regularmaing a Scuol. «Eu vaiva relaziuns persunalas in l'Engiadin'Ota ed uossa n'haja impris a cugnuoscher tuot la val», manzuna'l. Per el es Scuol ün lö bain situà ingio chi's riva svelta nanpro da mincha vart. «Da qua davent as poja eir planisar bain seis temp liber dürant ils seminaris e la regiun spordscha bleras attraziuns als giasts.» Intant ha'l gnü la pussibilità da visitar ils cumüns vaschins ed ha pudü discuorrer cun blera gleud.


«Cur ch'eu sun a Scuol am sainta simpla maing da chasa», constata'l e: «Id es fich interessant che chi vain tuot fat in quista destinaziun da vacanzas.» Il plaschair per la regiun voul el dar inavant a las partecipantas e'ls partecipants da seis cuors artischanas.

Resguardar ils nouvs trends

Sias pretaisas persunalas a seis arrandschamaints sun da svagliar las emeziuns cun l'agid da las observaziuns fattas cun verer, cun palpar, cun tadlar e cun savurar. René Fritschi sviluppa seis seminaris e cuors cuntinuadamaing in resguardond ils plü nouvs trends. Fin uossa gnivan sports ils cuors cun lavurar la bunura e'l davomezdi stiva als partecipants a libra disposiziun. «Nouv dess esser il cuntgnü da l'instrucziun plü focussà uschè chi resta amo avuonda temp per giodair cun tu-

ot ils sens la particularità da la regiun dal Parc Naziunal Svizzer», declera Fritschi. Chi chi ha interess ha plünavant la pussibilità da's partecipar al program da temp liber. Il mansteran paschiunà da l'Argovia disch da sai svesa ch'el saja ün allrounder chi haja experienza da lavurar cun divers materials. «Perquai saja eir che infrastruttura chi fa dabsögn pels singuls cuors, e meis böt es d'avair scha pussibel persunas da la regiun chi mainan ils seminaris», declera Fritschi. El ha plaschair da produer svesa prodots ed es persvas cha quai detta a minchün ün sentiment da cuntantezza. Las localitats dals seminaris restan eir suot sia guida ils medems sco pro'ls anteriurs proprietaris da la Pro Manufacta Engiadina.

Ulteriuras infoormaziuns e las datas dals cuors as chatta sülla pagina d'internet www.promanufacta.ch.



René Fritschi voul mantgnair la spüerta dals seminaris cun lavuors artischanas e tradiziunalas.



Eir a cuschinar as poja imprendere pro la Pro Manufacta Engiadina a Scuol.